

Հայոց լեզվի և հայ գրականության ուսուցիչների վերապատրաստման դասընթաց

## Ավարտական հետազոտական աշխատանք

Թեմա՝ Վահան Տերյանի <<Մթնշաղի անուրջներ>> ժողովածուի  
բանաստեղծությունների ուսուցումը  
Կատարող՝ Սուսաննա Մելքոնյան  
Ղպրոց՝ Հովի. Շիրազի անվան թիվ 169 հիմնական դպրոց  
Առարկա՝ Հայոց լեզու և հայ գրականություն

Խմբի պատասխանատու՝ Անահիտ Զոհրաբյան

Երևան 2023 թ.

## Բովանդակություն

Ներածություն.....	3
«Մթնշաղի անուրջներ».....	5
Բանաստեղծությունների այլընտրանքային ուսուցման մեթոդներ.....	16
Եզրակացություն.....	17
Գրականության ցանկ.....	19

# Ներածություն

Վահան Տերյանը մեր պոեզիայի ամենասիրված ու նվիրական անուններից է: Նրա անդրանիկ ժողովածուն՝ «Մթնշաղի անուրջներ»-ը, իր հասարակական և գեղագիտական բովանդակությամբ, կառուցվածով, պատկերների, ոճի և լեզվի յուրահատկությամբ նոր դարագլուխ բացեց հայ բանաստեղծության պատմության մեջ: Իսահակյանը, իրավամբ, նրան անվանել է «հայ պառնասի անգերազանցելի տաղանդ», նաև հավաստել, որ «նրա բանաստեղծություններից անվիճելի մի քանակ կմնան որպես հավերժական արժեքներ բոլոր ժամանակների համար, որպես մարդկային բյուրեղացած զգացմունքներ և անխառն գեղեցկություններ»:

Տերյանի բանաստեղծությունների ուսումնասիրության **նպատակն** է

1. առաջացնել հետաքրքրասիրություն, որպեսզի սովորողները կարդան, սովորեն, զգան Տերյանի շունչը և հաղորդակից լինեն նրա պոեզիայի գոհարներին
2. ծանոթանալ գործող մեթոդներին և ուսումնասիրել ու գտնել այլ տարբերակներ:

Հետազոտական աշխատանքի **խնդիրներն են**՝

1. Անդրադառնալ Տերյանի գրական ժառանգությանը և վերլուծել <<Մթնշաղի անուրջներ>> ժողովածուի մի քանի բանաստեղծություններ

2. գտնել բանաստեղծությունների ուսուցման այլընտրանքային մեթոդներ

3. զարգացնել սովորել սովորելու, մշակութային, լեզվական կարողունակություններ, ինչպես նաև ստեղծել միջառարկայական կապեր:

Աշխատանքի **արդիականությունը** պայմանավորված է նրանով, որ Տերյանի սիրո երգերը դիպչում են պատանիների հոգու լարերին, դրանք արդիական են բոլոր ժամանակներում: Տերյանն այսօր նույնքան սիրելի է, որքան 20-րդ դարի սկզբին: Նրա ստեղծագործությունները երբեք չեն կորցնում իրենց գաղափարական և գեղարվեստական թարմությունն ու գրավչությունը: Քանի որ սերը հավերժական է, հավերժական է նաև Տերյանը: Նրա բանաստեղծություններն ընթերցում ենք ոչ թե պատգամներ ու խրատներ քաղելու, այլ մարդկային գեղեցիկ զգացմունքներ վերապրելու:

## «Մթնշաղի անուրջներ»

Տերյանը սիրում էր մարդկանց աշխարհը: Այդ մեծ սիրուց էլ ծնվել են նրա լավագույն երգերը: Կատարյալ է նրա պատկերավորման և արտահայտչական միջոցների օգտագործման վարպետությունը: Նա նոր աստիճանի է բարձրացնում հայ պոեզիայի տաղաչափությունը, հարստացնում նոր ձևերով՝ օգտագործելով ռուսական և արևմտաեվրոպական հին ու նոր պոեզիայի փորձը: Տերյանն առաջինն էր, որ բանաստեղծությունները դասավորեց շարքերով, որոնք ունեն նաև ներքին տրամաբանական և երաժշտականություն և գրված են ոսկեղենիկ, անաղարտ մայրենի լեզվով:

Նուրբ ու հմայիչ են Վահան Տերյանի բանաստեղծությունները, նույնքան գեղեցիկ, որքան հայրենի Ջավախքի բնությունը:

Իր ծննդավայրը՝ Գանձան, մի չքնաղ գյուղ է՝ թառած երկինք մխրձվող լեռնապարի լանջին: Այնտեղ երկինքն ու երկիրը կարծես սահման չունեն, խառնված են իրար: Այդ բարձրությունից զարմանալի պայծառ են երևում դաշտերն ու արտերը, որոնց վրա փռվում է կապույտ, երազային, թախծոտ մշուշը: Գյուղից մի փոքր հեռու՝ վեհանիստ բարձրության վրա, ծփում է անհանգիստ Փարվանա լիճը:

«Ես եղել եմ էն երկնքի մոտիկ լեռնադաշտում, ուր ծնվել է Տերյանը, և կարծես թե նա լիքն է էն մշուշային թախիծով ու քնքուշ երազներով, որ բնորոշում են մեր բանաստեղծի քնարը», - ասել է Թումանյանը և նշել, որ Տերյանի թախիծը գալիս է ոչ թե օտար ակունքներից, այլ ծննդավայրից՝ չքնաղ Ջավախքից:

<<Թախծում եմ, ճիշտ է, բայց այնպես լուսավոր...>> ,\_ գրում էր Տերյանը:

Բնությունն ու գյուղական կյանքն անջնջելի հետք են թողել Տերյանի ստեղծագործությունների վրա, թե ու թեիչք տվել նրա երազկոտ ու տպավորվող երևակայությանը:

Ընթերցելով <<Մթնշաղի անուրջներ>> ժողովածուն՝ կտրվում ենք իրականությունից՝ տեղափոխվելով հեքիաթային և գողտրիկ մի աշխարհ: Մարդու հոգեկան գեղեցկության և նրբակերտ երգերով Տերյանը մեր գրականության ամենամեծ ու ինքնատիպ դեմքերից է, նվիրական ու հարազատ պոետներից:

«Մթնշաղի անուրջներ» է կոչվում թե՛ առաջին ժողովածուն, թե՛ նույնանուն շարքը: Մթնշաղը իրիկնաժամն է, իրիկնաժամի թեթև աղջամուղջը, ավարտվող լույսի և

սկսվող մութի պահը, երբ երազներով տարված հաճելի է զբոսնել: Անուրջը երազանքն է, տեսիլքը, երևակայության մեջ ընկնելու պահը, երանելի, փափագելի զգացողությունների շուրջ լուռ մտորելը: Տերյանի քնարական հերոսը նոր կերպար է: Ի տարբերություն 19-րդ դարի հայ բանաստեղծների՝ Տերյանը քաղաքի երգիչ է: «Քաղաք» վերնագրով ունի երկու բանաստեղծություն, որոնցից մեկն ունի «Քաղաքի երգեր» շարքից հղում, ինչը նշանակում է, որ նա մտադիր էր գրել համանուն շարք: Անկախ դրանից՝ Տերյանի ողջ շարքը հագեցած է քաղաքային բնապատկերներով: Քաղաքի բնակիչն է նրա հերոսը, մտավորական անհատը, որն ապրում է քաղաքային կենցաղով: Քաղաքի երգիչներին ասում էին ուրբանիստ, նրանցից էր բելգիացի բանաստեղծ Էմիլ Կերիարնը: Առաջին հրատարակությունից հետո Տերյանը հետագայում կատարել է լեզվաորձական փոփոխություններ: Նախապես եղած 72-ից բանաստեղծությունների թիվը հասել է 77-ի: Շարքը բացվում է «Տխրություն» բանաստեղծությամբ.

*Սահուն քայլերով, աննշմար, որպես քնքուշ մութի թև,*

*Մի ստվեր անցավ ծաղիկ ու կանաչ մեղմիվ շոյելով.*

*Իրիկնաժամին, թփերն օրորող հովի պես թեթև*

*Մի ուրու անցավ, մի գունատ աղջիկ ճերմակ շորերով...*

Տխրությունը Տերյանի ամբողջ ժողովածուի համար դառնում է գերիշխող հոգեվիճակ, դառնում գեղագիտական արժեք՝ բնորոշ հատկապես վեհ ու տառապող հոգիներին: Այդ գլխավոր հոգեվիճակն աստիճանաբար սաստկանում է տխրությունը խորհրդանշող առանձին պատկերներով՝ աշուն, անձրև, թափվող տերևներ, միայնություն, անհուսություն, օտարվածություն, սիրո անհասանելիություն, տևական սպասում: Տխրությունն ինքնին հանդես է գալիս տարբեր նրբերանգներով՝ ցավ, տառապանք, տագնապ, թախիծ, արցունք...

Լուսավոր և վեհ է Տերյանի թախիծը, որովհետև նրան առաջնորդում է երջանիկ կյանքի ու բարձր սիրո երազանքը:

«Տխրություն» բանաստեղծության մեջ Տերյանի պատրանքը մարմավորող գեղեցկուհին է, ով ստվերի նման անցնում է «սահուն քայլերով» և իրիկնաժամի ամայության մեջ թողնում իր մեղմ շշուկը: Նրա շշուկը փոխանցվում է բնությանը՝ դաշտերին ու ծաղիկներին, որոնք էլ իրենց հերթին նրա սիրտը լցնում են այդ սուրբ

շշունջով: Կինը որպես գեղեցկության մարմավորում ծուլվում է բնությանը, իսկ բնությունն այդ գեղեցկությամբ պարուրում է բանաստեղծի հոգին:

Տերյանի հերոսուհուն մենք տեսնում ենք բնության գրկում: Նա անցնում է՝ «ծաղիկ ու կանաչ մեղմիվ շոյելով», նրա անցնելը նմանեցվում է «թփերն օրորող» թեթև հովի, նա շշնջում է արծակ դաշտերի ամայության մեջ, սիրո խոսք է ասում նիրհող դաշտերին, նրա շշուկը փոխանցվում է ծաղիկներին, որոնք էլ այդ սուրբ շշուկով լցնում են բանաստեղծի սիրտը: Աղջիկն ինքը ևս բնության մաս է, որ ծուլվում է ծաղիկներին և վերապրում է բանաստեղծի էության մեջ:

Ժողովածուի գրեթե բոլոր բանաստեղծությունները էլեգիաներ են և ունեն խորապես անձնական բովանդակություն: Աշնանային թախծոտ երաժշտությունը շարունակվում է «Աշնան մեղեդի» բանաստեղծության մեջ, դառնում է սառը, պաղ ստվերների շարք, հոգին պարուրող անուրախ անհանգստություն, ինչը վերստին ցավեցնում է նրա հիվանդ հոգին, և բանաստեղծն ասում է. «Իմ հոգու համար չկա արշալույս...»:

Ինչպես գիտենք Տերյանին անվանում են սիրո մեծ բանաստեղծ: Նրա գրեթե բոլոր բանաստեղծությունները սիրո մասին են: Կամ եթե սիրո մասին չեն նա այնպես է գրել, որ ընթերցողը բանաստեղծության մեջ գտնի գեղեցկություն, սեր:

Վահան Տերյանի քնարերգությունը իր հասարակագիտական և գեղարվեստական բովանդակությամբ, պատկերի, ոճի և լեզվի յուրահատկությամբ նոր դարագլուխ բացեց հայ բանաստեղծության պատմության մեջ: Նրա ստեղծագործական ուղին, որ տևեց շուրջ տասնհինգ տարի (1904-1919) համընկնում է հենց այն ժամանակաշրջանի հետ, երբ արևելահայ բանաստեղծության ամենից ազդեցիկ կենտրոնական դեմքերը Հովհաննես Թումանյանը և Ավ. Իսահակյանն էին:

Իր պոեզիայի բոլորովին նոր մոտիվներով ու ձևերով Տերյանը ոչ միայն շարունակեց իր մեծ նախորդների գործը և կանգնեց նրանց կողքին, այլև հատուկ ուժով ընդգծեց դարասկզբին հայ բանաստեղծության բազմաշերտությունը:

Հայտնի է նաև, որ «Տերյանի դարաշրջանը» հայ պոեզիայում նրա մահով չավարտվեց: Նրա բանաստեղծական ավանդույթները շարունակվեցին նաև հաջորդ տասնամյակներում, պայմանականորեն ասած՝ «Չարենցի դարաշրջանում»:

Իր կենդանության ժամանակ Վահան Տերյանը հրատարակել է ընդամենը երկու գիրք՝ «Մթնշաղի անուրջներ» ժողովածուն (1908) և «Բանաստեղծությունների» առաջին հատորը (1912):

Տերյանի առաջին գրքի վերնագրի երկու բաղադրամասերը («մթնշաղ» և «անուրջներ») առանձին-առանձին և, մանավանդ, միասին վերցրած արտահայտում են շարքի բովանդակության և պատկերային համակարգի մի քանի կողմերը:

Իրոք, «մթնշաղը» կամ «իրիկնաժամը» բանաստեղծի ամենասիրած պահն էր: Օրվա այդ պահի մասին շարքի 77 բանաստեղծություններից (այստեղ և հետագայում նկատի ունենք «Մթնշաղի անուրջների») երկրորդ խմբագրությունը՝ զետեղված 1912թ. հատորում) խոսվում է առնվազն քսանի մեջ: Ինձ վերաբերում է «անուրջներին» ապա մենք դա նկատում ենք տասնութ բանաստեղծության մեջ:

Տերյանի քնարական հերոսի իդեալը մշտապես մնում է երազային՝ հակադրվելով իրականությանը:

1912թ. կազմելով իր բանաստեղծությունների առաջին գիրքը Վահան Տերյանը չի դրել իր քաղաքացիական բանաստեղծություններից և ոչ մեկը: Նա պարզապես չի սիրել այդ կարգի բանաստեղծությունները: Պետք է հաշվի առնել նաև այն հանգամանքը, որ այսօր մեր գիտակցության մեջ ապրում է ոչ թե 1908թ. «Մթնշաղի անուրջներ»-ը, այլ 1912-ի:

1908 թվականինը որքան ջերմ ընդունվեց, նույնքան էլ ժամանակի քննադատ Նիկոլ Աղբալյանի կողմից ենթարկվեց խիստ դիտողությունների, որոնք վերաբերում էին նաև արվեստի և լեզվի հարցերին:

Նշենք մի քանի արտահայտություններ՝ «հանգերը շատ աղքատ են», «լավ չի տիրապետում հայոց լեզվին», «անտաշ լեզու» և այլն:

Տերյանն իր ստեղծագործության զարգացմանը զուգընթաց լրջորեն հաշվի առավ այդ քննադատությունը և 1912թ. տպագրած «Բանաստեղծություններ» ժողովածուի մեջ ներկայացրեց «Մթնշաղի անուրջներ»-ի հղկված, լրացված, բարեփոխված նոր ու վերջնական տարբերակը՝ դուրս թողնելով գյուղացիական ավանդույթների անցանկալի ազդեցություններով գրված մի քանի գործեր, որոնք գալիս էին հիմնականում Իսահակյանից:

«Մթնշաղի անուրջներ»-ի առաջին հրատարակության 72 բանաստեղծություններից երկրորդին անցավ 66-ը, որոնցից 64-ը՝ մեծ ու փոքր խմբագրություններով: Այսինքն միայն երկու բանաստեղծություն է պահպանվել նույնությամբ, իսկ վեց գործ դուրս է մնացել՝ համարվելով «անհարազատ տարր» (Մակինջյան):

Ըստ Տերյանի 1912թ. գրքի առաջաբանի՝ դրանք <<սերտ կապ չունեն մյուս գրվածքների հետ>>, ուստի կարող են դուրս հանվել գրքից:

Տերյանը շարունակել է հղկել, մշակել այդ գործերը, կատարել է լեզվաոճական փոփոխություններ, վերանայել է բառապաշարը:

Ստեղծագործական այս աշխատանքը ակնհայտորեն վկայում է նրա գեղագիտական ճաշակի զարգացումն ու կատարելագործումը: Նա նաև վերակառուցել է շարքը՝ դուրս թողնելով վեց և ավելացնելով տասնմեկ բանաստեղծություն, դրա շնորհիվ նախապես հայտնի 72 բանաստեղծությունների թիվը դարձել է 77:

Տերյանի առաջին գիրքը <<Մթնշաղի անուրջներ>>-ը արդյունք էր նախնական կուտակման այն տարիների փորձի և տպավորությունների, երբ նա դեռ գրող չէր՝ երեխա էր, պատանի, երիտասարդ: Երբ հայրենի դաշտերն էր չափչփում, մեծերի սրտամոտ երգերն ու պատմություններն էր լսում: Ղարոցում և համալսարանում սովորում և, աչքը բացելով աշխարհի վրա, հազար ու մի լավ ու վատ է տեսնում, հուզվում, զայրանում, սիրում ու անրջում, ցնորքներ ու իդեալներ փայփայում, հիասթափություններ ողբում:

Քնարերգակների առաջին գրքերը երբեմն լինում են ամենից լավը, երբեմն էլ եթե ոչ ամենալավը, ապա ամենից անմիջականը: Առաջին գրքերից էր քսաներեքամյա Տերյանի <<Մթնշաղի անուրջներ>>-ը: Շուրջ 77 բանաստեղծություն և մեծ քնարերգուի ծնունդ: <<Մի առավոտ զարթնում են հայտնի դարձած>>: Տերյանը այդպիսիներից էր: Իսկ մինչ այդ նա գրել է բանաստեղծություններ, որոնք մեզ չեն հասել: Նա տպագիր սկսնակ չի եղել: Առաջին անգամ երբ Իսահակյանը կարդում է Տերյանի բանաստեղծությունների տետրակը, վրան գրված է լինում <<Արիւն>> բառը: Վարպետը զարմանքով ասում է. <<Մի՞թե արյան երգեր ես գրում>>: Վահան Տերյանի ընկերը ծիծաղում է՝ ասելով, որ Իսահակյանը հակառակ կարդա՝ <<Նիւրա>>: Իրական թե անրջային, իր սիրած աղջկա անունն է Նիւրա, որին նվիրված էին ոտանավորները: Գրականագետները, հենվելով այս բանաստեղծությունների վրա, խոսել են երկու Տերյանի մասին, երբեմն ուղղակի հակադրելով վաղ շրջանը և <<Մթնշաղի անուրջները>>: Այսօր դժվար է ասել թե ինչ բան է <<Արիւն>> տետրը, որից դժգոհ էր մնացել բանաստեղծը:

1908թ. մայիսի 16-ին Թիֆլիսում <<Մթնշաղի անուրջները>> լույս տեսնելուց մի փոքր առաջ, Թումանյանը, կարդալով բանաստեղծությունները գրում է. <<Պետք է նկատեն, որ ես քաշվում էի, մանավանդ, որ չնայած իր պարզության, ինձ վրա



տպավորություն գործեց, ինչ որ գյոթեական բան կա նրա մեջ: Գուցե հասա՞կը, կամ հենց այդ հանդարտ պարզությունը-չգիտեմ>>: Թումանյանին ամենից առաջ հետաքրքրում է <<նոր բանաստեղծի տեսորը>>:

Ի՞նչ պահանջ ուներ Թումանյանը ամեն մի նոր բանաստեղծի նկատմամբ: <<Ղա այն է, թե արդյո՞ք մի ինքնուրույն- նոր բան է բերում այդ մարդը, կամ ցույց է տալիս նշաններ այդ ունենալու>>: Եվ ահա Թումանյանը տալիս է իր վճիռը. <<Ձեր վերաբերմամբ պետք է պատասխանել դրականապես: Դուք բանաստեղծ եք: Ղա ամենագլխավորն է>>: Շուտով լույս է տեսնում տեսորը՝ <<Մթնշաղի անուրջները>>: Լիովին հաստատվում են Թումանյանի և Իսահակյանի գնահատությունը և գովասանքները: Գիրքը հռչակվում է շատ մեծ արագությամբ, առասպելական մշուշ է ստեղծվում բանաստեղծի շուրջը: Գրական մթնոլորտը բռնկվում է Տերյանի շնչով: Բանաստեղծական ոչ մի գիրք մեզանում չէր արժանացել նման բախտի: <<Մթնշաղի անուրջներ>>-ը գրավել էր գրեթե բոլորին՝ գրական նշանավոր մարդկանց՝ բանաստեղծներին, քննադատներին, մտավորականության լայն շրջաններին: Եվ դրա հետ միասին եկավ մեծ ժողովրդականությունը: Երիտասարդությունը ամբողջովին համակվեց տերյանական տրամադրությամբ: Նրանցից մեկն էլ դեռ գրական առաջին փորձեր անող, ապագայի խոշոր արձակագիր Ստեփան Ջորյանն էր: Նա արտասովոր երևույթ է համարում Տերյանի մուտքն ու զարմանալի հայտնությունը, պատմում ժողովրդի սրտագին ընդունելության և ստեղծած լուսավոր, տոնական մթնոլորտի մասին: Ստ. Ջորյանի կարծիքով. <<Մեր գրականության պատմությունը չի տեսել բանաստեղծական երկի այնպիսի ընդունելություն, որին արժանացավ Տերյանի <<Մթնշաղի անուրջներ>> ժողովածուն: Բոլոր քննադատները երիտասարդ Տերյանի մեջ նկատեցին նորություն, թարմություն և տաղանդ>>:

Այս ժողովածուն ավելի ջերմ ընդունելություն գտավ երիտասարդության կողմից և կարճ միջոցում Տերյանն ունեցավ հետևորդների մի ամբողջ բազմություն, իսկ երկրպագուներին թիվ չկար:

Տերյանի պոեզիայում սերն էլ, վիշտն էլ, արևածագի և գարնան սպասումն էլ ուրիշ ձևերով և եղանակներով, արտահայտչական ուրիշ միջոցներով են երգված: Նա մեր ամենից ինքնատիպ գրողներից է, անհնար է նրա ձայնն ու շունչը իսկույն չտարբերել, նրա տողն ու խոսքը շփոթել ուրիշի հետ: Այդ պատճառով է, որ մեծերը այս ժողովածուն համարեցին ինքնատիպ ու նոր երևույթ:

<<Մթնշաղի անուրջներ>>-ի բանաստեղծությունները գրավում են անսահման հարազատությամբ, մարդու հոգեկան աշխարհի, նվիրական հույզերի ու իղձերի նրբին ու մտերիմ արտահայտումով, անուրջ կույսի սուրբ շշուկով, լույս երազների քաղցրությամբ ու հուսախաբությունների թախիծով:

Քիչ գրքեր, մանավանդ երախայրիքներ կան, որ երկարակյաց են լինում: Տերյանի առաջին ժողովածուն ամենաերկարակյացներից է: Ստ. Ջորյանը իր հուշերում գրել է, որ այդ տարիներին գրական մթնոլորտը շնչում էր Տերյանով:

<<Մթնշաղի անուրջներ>>-ը <<գեղեցիկ արշալույս>> էր, որ պայծառ օր էր խոստանում: Այս ժողովածուն իր կախարդական հմայքով գլխովին մոլորեցրել էր, նվաճել ընթերցողին: Այն այնքան թարմ ու նոր էր, որ մի պահ մոռացվեցին մյուս բանաստեղծները: Տերյանը միանգամից ընդհանուր ճանաչում գտավ՝ մեր գրականության անդաստանը բերելով աննախընթաց նորություններ: Երիտասարդության խոսակցության նյութը ամեն տեղ նրա բանաստեղծություններն էին, իսկ ընկերների և սիրահարների սրտագին նվերը միմյանց՝ <<Մթնշաղի անուրջներ>>-ը: Այս գրքույկը իր գաղափարական ու գրական կուլտուրայի իմաստով նոր աստիճան նշանավորեց և նոր ուղի նշեց նրա զարգացման համար:

Պատանի հասակում հեռանալով հայրենի եզերքից՝ Տերյանը անջատված զգաց իրեն հավիտենական այն մասունքներից, որոնք խմորել էին նրա մարմնի և հուզու բջիջները: Անջատվածության այս զգացումը մի անլցելի ճեղք էր ստեղծել Տերյանի բանաստեղծական <<տեսողության>> մեջ, իրերի արտապատկերները գծելով թափանցիկ ստվերների շղարշով:

...Ինձ այրում է միշտ մի անհագ թախիծ,  
Հավիտյան դյուբոդ անհայտ ճանապարհ

Ժամանակի և տարածության միավորները Տերյանը չափեց էկզոտիկ հեռավորության վրա և անցյալն ու ներկան հարաբերեց երազ աշխարհի հուշերում: Գեղեցիկ անուրջներին և ցնորքներին տրվելը տիպիկ իրականությունից կտրվելու ձգտումն է, որը իրական կամ անիրական հակադրվում է շրջապատող աշխարհի անհրապույր պատկերներին: Այս առումով անրջայինը թևածում է ամբողջ շարքի վրա: Հենց մթնշաղային և անրջային պատկերներն են, որ միավորում և համախմբում են շարքի

բանաստեղծություններն ընդհանուր վերնագրի <<հովանու տակ>>, ստեղծում են մի ավարտուն ամբողջություն ինչպես իմաստի, այնպես էլ կառուցվածքի առումով:

Հատկանշական է, որ շարքը բացող առաջին իսկ բանաստեղծությունը՝ նշանավոր <<Տխրություն>>-ը պարունակում է և՛ իրիկնաժամը, և՛ անրջային պատկերը, թեև ոչ թե իբրև հոգեվիճակ այլ մարմնավորված <<գունատ աղջկա>> կերպարի մեջ: Ժողովածուն սկսում է թախծոտ տրամադրությամբ՝ աշնան տխուր մեղեդիներով, նրբակերտ մթնշաղի և վերջալույսի, մեռնող բնության և դալուկ աշնան պատկերներով և ավարտվում է գարնանային պայծառ երգերով:

<<Տխրություն>> բանաստեղծությունը գրված է արտասովոր նրբությամբ և ունի գերող երաժշտականություն: Տխրությունը խորհրդանշող աղջիկը նման է քնքուշ մութի թևին, իրիկնաժամին թփերն օրորող թեթև հովին: Նա գունատ է, ճերմակ շորերի ու ստվերի պես անմարմին ու աննշմար, մթնոլորտը լցնում է ազնիվ տխրությամբ և գերող թախիծով:

<<Աշնան մեղեդին>> բանաստեղծությունը նույնպես ցաված հոգու արծազանքն է: Աշնան երանգները խտացնում են տրամադրությունը, մթնոլորտ ստեղծում ցավագին ապրումների համար:

Աշուն է, անձրև... Ստվերներն անձև դողում են դանդաղ... Պաղ, միապաղաղ...

Հոգնած քնարական հերոսին աշխարհը պատկերանում է որպես ոսկե տեսիլների, հեռավոր լույս անուրջների մի շղթա: Նա չի ցանկանում այլևս տառապել:

Աշնան թախծալի երգը նաև բանաստեղծի սրտի երգն է: Քնարական հերոսը սիրում է աշխարհը, բայց կյանքի ամեն մի հարված հետք է թողնում նրբազգաց հոգու վրա: Նա երագում է մտերմիկ խոսք, փրկության կանչող ձայն: Խավարում մոլորված հոգու մեջ արթնանում են աշխարհի կարոտն ու կյանքի սերը:

Բանաստեղծին տանջում է բախտի ու երջանկության հարցը: Տերյանի սիրային լիրիկայի մեջ գերիշխողը երազային, անիրական սերն է:

Սեր փնտրելով կյանքում և այն չգտնելով՝ պոետը մի <<քնքուշ հեքիաթ>> էր հյուսել <<լուսերես, անմարմին, անանուն>> աղջկա մասին՝ այն հակադրելով <<կյանքի չար երազին>>:

Ես սիրում եմ երազ ու ստվեր,

Ես իմ սերն եմ սիրում...

Նա հերոսի ցավին տալիս է խոր իմաստ, դառնությամբ բողոքում ապականված աշխարհի դեմ, ուր սերը վաճառքի է հանվում:

Տերյանը հյուսում է թախծոտ ու քնքուշ երգեր, մեծարում է կնոջը, նվիրագործում ճշմարիտ գեղեցկությունը:

Սերը մաքրագործող այդ զգացմունքը նեցուկ է լինում իրեն այդ աշխարհում:

Բանաստեղծը կատարում է մի շատ գեղեցիկ զուգահեռ երկնային մարմինների խորհրդավոր ընթացքի և երկրային ցաված հոգիների միջև: Այդպես է նաև մարդկանց աշխարհը: Նրանցից ամեն մեկը մի առանձին մոլորակ, մի ինքնուրույն տիեզերական մարմին, և ամեն մեկը ձգտում է դեպի աշխարհը, դեպի հարազատ հոգին:

Տերյանի քնարերգության հիմնական տրամադրություններից մեկը անհասանելի սերն է:

Այդ սիրո առջև բանաստեղծի կյանքն է՝ որպես <<մի լուսեղեն հեքիաթ>>, հեռվում <<անհայտ կորած մի հեզ լույս>>, որը ցնորք աղջկա համար հավետ անծանոթ տաճարում <<Կանթեղի պես առկայծում է քո դիմաց>>:

Հաջորդում է <<Fatum>> բանաստեղծությունը՝ նրբագեղ ապրումների մի շղթա, որի մեջ սիրատենչ հոգիները նմանվում են երկնքում շողացող աստղերի, որոնք ավաղ հեռու են իրարից:

Կախարդական մի շղթա կա երկնքում՝  
Աներևույթ, որպես ցավը խոր հոգու.  
Իջնում է նա հուշիկ, որպես իրիկուն,  
Օղակելով լույս աստղերը մեկ-մեկու:  
Մեղմ գիշերի գեղազանգուր երազում՝  
Այն աստղերը, որպես մոմեր սրբազան,  
Առկայծում են կարոտագին, երազուն՝  
Հավերժաբար իրար կապված և բաժան:  
Ես ու դու էլ շղթայված ենք իրարու.  
Կարոտավառ երազում ենք միշտ իրար,  
Միշտ իրար հետ, բայց միշտ բաժան և հեռու,  
Աստղերի պես և՛ հարազատ, և՛ օտար...

Բնության և մարդկային հոգու կախարդիչ մի պահ է: Երկնքում աստղերի աներևույթ շղթան նմանեցվում է խոր հոգու ցավին: Այդ աներևույթ շղթան կախարդական է, որն իջնում է <<հուշիկ, որպես իրիկուն>>:

Տերյանին մշտապես հարազատ, սրտակից և մտերիմ են իրիկնաժամի հոգեհարազատ պահերը: Նրա <<Մթնշաղ>> բանաստեղծությունը ասես սիրո խոստովանություն լինի, բայց ոչ թե ցնորք աղջկան այլ հոգեհարազատ այն պահին, որին մեջ բանաստեղծն ասես յուրովի վերագտնում է իրեն:

Ես սիրում եմ մթնշաղը նրբակերտ,  
Երբ ամեն ինչ երագում է հոգու հետ,  
Երբ ամեն ինչ, խորհրդավոր ու խոհուն,  
Ցնորում է կապույտ մութի աշխարհում...  
Չկա ոչ մի սահման դնող պայծառ շող,  
Աղմուկի բեռ, մարդկային դեմք սիրտ մաշող,-  
Հիվանդ սիրտը չի տրտնջում, չի ցավում,  
Որպես երագ մոռացումի անձավում.  
Եվ թվում է, որ անեզր է ամեն ինչ -  
Որ ողջ կյանքդ է մի անսահման քաղցր նինջ...

Մթնշաղը ոգևորում է բանաստեղծին, որովհետև անուրջների պահն է, ամեն ինչ խորհրդավոր ու խոհուն անցումներով նրան պարուրում է ցնորքների մեջ: Կապույտը երագանքի գույնն է: Անրջական այդ պահը գտնված է, որովհետև մարել են օրվա աղմուկները, հեռու են սառն ու օտար մարդկային դեմքերը, հիվանդ սիրտը չի տրտնջում, կյանքն ասես լինի <<քաղցր նինջ>>:

Բանաստեղծը, որն անսահման թախիծով է երգում կյանքի տառապանքները, <<Մթնշաղի անուրջներ>>-ը ավարտվում է <<Գարնանամուտ>> բանաստեղծությամբ, որի մեջ ողջույն է հղում իր հոգում էլ նոր սեր հրդեհած, նոր երգեր ներշնչող արևին և գարնանը:

Նոր երգերից է <<Գարուն>> բանաստեղծությունը՝ գրված 1908թ. այստեղ գարնան գույները ծուլված են պայծառ ապրումներին: Ծաղկած գարունը ծնում է սիրո և քնքանքի ցանկություն:

Գարունը այնքան ծաղիկ է վառել,  
Գարունը այնպե՛ս պայծառ է կրկին.  
— Ուզում եմ մեկին քնքշորեն սիրել,  
Ուզում եմ անուշ փայփայել մեկին:

Ներկայացնում է գարնան պատկերը <<հոգու անուշ տազնապը>>, որն անընդհատ աճելով նոր հուզում է արթնացնում մարդկանց հոգիներում:

Տերյանի նույնիսկ ամենամռայլ թվացող բանաստեղծության մեջ հաճախ կարելի է նկատել լույսի շող, կյանքի, արևի, գարնան, մարդու կարոտ: Նրա հոգին տենչում է արշալույս, նա սպասում է իր կյանքի այգաբացին:

Նրա քնարական հերոսը բազմիցս հավաստում է, որ ինքը դուրս է եկել մենության բանտից՝ զվարթ ու ջախել, հզոր ու հպարտ, որ ինքը վերածնվել է:

Իմ կյանքը մի նուրբ մշուշ է պատել,  
Գուրգուրում է ինձ մի լույս հանգրվան...

Նա ամենանեղ պահին անգամ չի չարանում աշխարհի դեմ: Նրա քնարական հերոսը անսահման մեղմ է և անհիշաչար: Բանաստեղծի թախծոտ տրամադրությունը արագ կարող է փոխվել կենսախնդության, ինչպես <<Գարնանամուտ>> բանաստեղծության մեջ: Այժմ անտառ ու ծորակ ժպտում են պոետին, գարունը զուգել է ամեն ինչ, ամեն տեղ <<նոր կյանք է վառել>>՝ նրա հոգում ևս հրդեհելով նոր սեր:

Քնքշաբույր ծաղկանց հրեղեն խաղով  
ժպտում են նորից անտառ ու ծորակ,  
Եվ հեղեղները խոսուն-սառնորակ  
Ողջունում են ինձ զվարթ ծիծաղով:  
Ջուգել ես նորից դաշտ, անտառ ու լեռ,  
Գարուն, ամեն տեղ նոր կյանք ես վառել  
Իմ սրտում էլ ես թևերդդ փռել,  
Իմ հոգում էլ ես հրդեհել նոր սեր:

Տերյանը երգում է նաև <<առավոտի դյուրական համբույրը>> և գինովցած <<նոր երագով>>, պատրաստ է բացսիրտ ու ազատ ժպտալ աշխարհին ու մարդկանց, սիրելի ու սիրվելի: Սերը ամեն ինչի հիմքն է, եթե սերը <<կյանքի պոեզիան ու արևն է>>, արդյոք նա իր մեջ չի՞ համատեղում սեր՝ կյանքի, արևի, մարդու և բնության նկատմամբ:

Աշխարհում ամեն լավ բան ծնվել է կնոջ հանդեպ տածած սիրուց:

Սեր ու երգ է իմ հոգում,

Սիրո երգ է իմ հոգին:

## **Բանաստեղծությունների ուսուցման այլընտրանքային մեթոդներ**

Պոեզիայի դասավանդումը միջին դպրոցում հաճախ կարող է լինել մարտահրավերային: Աշակերտներից ոմանք կարող են սիրով ընթերցել և սովորել դրանք, իսկ ոմանք հակառակը: Դասավանդման դժվարությունը կայանում է նրանում, որ կարողանանք ոգևորել աշակերտներին և ուսուցման գործընթացը դարձնենք ավելի հետաքրքիր և ինտերակտիվ: Դասապրոցեսում անհրաժեշտ է կիրառել այնպիսի մեթոդներ, որոնք կնպաստեն աշակերտների հետաքրքրվածության բարձր աստիճանին և ներքին մոտիվացիային:

Տերյանի բանաստեղծությունները սիրելի են շատերին, սակայն քանի որ որոշ աշակերտներ դժվարություններ են ունենում միայն ընթերցելով հիշել բանաստեղծությունը, դասերի ընթացքում մենք օգտվում ենք նաև այլ մեթոդներից: Դրանցից մեկը բանաստեղծությունների ուսուցանումն է երաժշտության միջոցով: Դասի ընթացքում համակարգչով միացնում ենք Տերյանի բանաստեղծությունները, որոնք այնքան երաժշտական են և տպավորիչ, որ շատերը երգեր են դարձել: Դասերի ընթացքում երեխաների հետ միասին երգում ենք, ինչն էլ նպաստում է ավելի արագ և սիրով սովորելուն:

Այսպիսով խթանում ենք միջառարկայական կապը, աշակերտները նույն թեմային անդրադառնում են տարբեր ուղղություններով և որոշների պարագայում այն ավելի սիրելի է դառնում:

Մյուս մեթոդը բանաստեղծությունները նկարելն ու պատկերելն է, ինչը Տերյանի ստեղծագործությունների պարագայում բավականին հեշտ է ստացվում: Երեխաներից շատերը նախագծային աշխատանքի շրջանակներում վերլուծում են բանաստեղծությունը, նկարում այն՝ պատկերելով և թղթին հանձնելով իրենց զգացողությունները:



## Եզրակացություն

Ուսումնասիրելով Տերյանի <<Մթնշաղի անուրջներ>> ժողովածուի որոշ բանաստեղծություններ գալիս ենք այն եզրակացության, որ այս գրքի լույսընծայումը բանաստեղծի <<հոգու թռիչքն էր>>, որը նրան անմիջապես կանգնեցրեց մեր դասականների կողքին: Նրա մուտքի ժամանակ արևելահայ պոեզիայում ամբողջ մեծությամբ կանգնած էին Հովհաննես Թումանյանը և Ավետիք Իսահակյանը: Նրանցից հետո Տերյանը կարողացավ նոր խոսք ասել: Նա խոսեց 20-րդ դարի մարդու լեզվով, տարբերվեց մյուսներից և իր համար <<արևի տակ>> տեղ բացեց՝ դառնալով ամենասիրված գրողներից մեկը, թերևս ամենից սիրվածը: Տերյանի մուտքը այնքան շքնալից էր, որ մի պահ մոռացվում են մեր բանաստեղծները, և սկսվում է տերյանական շրջան՝ <<Տերյանի էպոխա>>: Հարկ է նշել, որ Տերյանի <<Մթնշաղի անուրջներ>> ժողովածուն հոգու մի անկրկնելի մատյան է՝ հույզերի, խոհերի, սիրո, կարոտների, երազների ներհուն գրանցումներով, որոնք կամրջում են մեզ իր ժամանակի հետ:

Ամփոփելով հետազոտական աշխատանքը, հանգում ենք այն եզրակացության, որ Տերյանի բանաստեղծությունների ուսուցանումը միջին դպրոցում անչափ կարևոր է: Այն նպաստում է աշակերտների գեղագիտական ճաշակի բարձրացմանը: Իսկ ուսուցանման գործընթացը ավելի արդյունավետ և հետաքրքիր կազմակերպելու համար անհրաժեշտ է կիրառել այլընտրանքային մեթոդներ, ինչպիսին է պոեզիայի ուսուցանումը երաժշտության և կերպարվեստի միջոցով: Սա էլ իր հերթին ապահովում է միջառարկայական կապը:

Տերյանի ամենամեծ և գնահատելի դերը նրանում է, որ նրա բանաստեղծությունները միշտ արդիական են: Մեկ դարից ավելի է անցել, բայց նրանք չեն խունացել, այլ ավելի են գեղեցկացել և նրանցից մի մասը երգի է վերածվել՝ հուզելով բազում սրտեր, պարուրելով մարդկանց հոգիները սիրով և ջերմությամբ:

Խորապես կապված ազգային գրականության ավանդույթներին և յուրացնելով մարդկության գեղագիտական փորձը՝ Տերյանը հայ քնարերգությունը հասցրեց համաշխարհային պոեզիայի բարձունքներին: Ժամանակը մեզ չի հեռացնում նշանավոր արվեստագետից, որն իր մարդկային զգացմունքների անսպառ

հարստությամբ այսօր էլ մեզ հետ է. խորհելիս՝ մեր մտքում, հուզվելիս՝ մեր սրտում: Տերյանի լիրիկան անբաժան է մեզնից, այն մեր պոեզիայի նոր ու բարձր աստիճանն է՝ մշակված, հղկված, երաժշտական նուրբ ու մեղմ արտահայտություններով: Ավ. Իսահակյանի խոսքերով ասած. <<Անցել են շատ տարիներ, բայց նրա պոեզիայի հմայքից ոչ մի նշանախեց չի պակասել: Նա մնում էր իր առաջին օրվա գեղեցկության մեջ, միշտ անփոխարինելի, միշտ անմրցելի>>:

## Օգտագործված գրականության ցանկ

1. <<Հայ նոր գրականության պատմություն>> հատոր 5-րդ, խմբ. Ս. Սարինյան. 1979թ.
2. Էդվարդ Զրբաշյան <<Չորս գագաթ>>, Երևան 1982թ.
3. <<Հայոց լեզու և գրականություն>> 6.2016, ՀՀ ԿԳՆ Կրթության ազգային ինստիտուտ, գլխ. խմբագիր Դավիթ Գասպարյան
4. <<Հայոց լեզու և գրականություն>> 2.2010, ՀՀ ԿԳՆ Կրթության ազգային ինստիտուտ, գլխ. խմբագիր Դավիթ Գասպարյան
5. Վաչե Պարտիզունի. <<Վահան Տերյան>> Երևան 1968թ.
6. Վաչե Պարտիզունի. <<Տերյանի կենսապատումը>>, Երևան 1984թ.
7. Հրանտ Թամրազյան. <<Վահան Տերյան>>, Երևան 1985թ.